

Script of Morning Gojri News Bulletin 25 October 2024 at 1015Hrs

مارننگ گو جری نیوز بلیٹن مو رخہ 25 اکتوبر 2024

یوہ آکا شوانی جموں بے عبید الرحمن تیں خبر سنو۔

Terror Attack

کشمیر غا ضلع با رہمولہ مانہہ گذشتہ شام ہوا دہشت گرد حملہ مانہہ 2 فوجی جوان شہید ہو گیا جد کہ 3 دوجا زخمی ہو گیا ہیں۔ اس حملہ مانہہ فوج غا 2 پورٹر وی شہید ہو گیا ہیں۔ زخمیاں غو اعلاج معالجو ہسپتال مانہہ چل رہیو ہے۔ بھارتیہ فوج غی چنار کو ر نے سوشل میڈیا پوسٹ ایکس ور اس گل غی تصدیق کی ہے کہ گذشتہ شام با رہمولہ گا بوٹا پتھری علا قہ مانہہ فوج تے دہشت گردان بشکا ر ٹاکرو ہوؤ جس مانہہ 2 طرفہ گو لی چلیں۔ دہشت گردان نے بوٹا پتھری غا مقام ور فوج غی اک گڈی نانہہ اپنو نشانو بناویو۔ اس ضمن مانہہ لیفٹنٹ گو رنر منوج سنہا نے فوج غا اعلیٰ افسراں تیں علا وہ جموں کشمیر پولیس تے انتظامی عہدیداراں نال گل کی ہے۔ اور ہدایت جا ری کی ہے کہ دہشت گردان نال نمڑن واسطے موثر اقدام کیا جا ئیں۔ موصوف نے ڈی سی با رہمولہ منگا شیرپا نانہہ ہدایت جا ری کی ہیں کہ وے اس حملہ مانہہ شہید ہوا آرمی پورٹراں غا گنباں غی ہر ممکن مدد کریں۔ لیفٹنٹ گو رنر نے اس حملہ مانہہ ہوا پورٹراں غا گنباں نال ڈونگا دکھ غو اظہار کیو ہے۔

Dy CM

نا ئب وزیر اعلیٰ سریندر کمار چودھری نے گذشتہ روز لیبر، روز گا ر تے ہنر ترقی محکماں غی اک جائزہ میٹنگ طلب کر غے اس گل ور زور پایو ہے کہ جموں کشمیر غا نوجواناں مانہہ صلاحیت غا باہدا تے روز گا رخاطر ہنر ترقی ور توجہ دین غی ضرورت ہے۔ اُن نے کہیو کہ ہنر گا باہدہ واسطے تیار کیا گیا کو رس نال نہ صرف نوجوان با اختیار بنیں گا بلکہ غیر ہنر مند افراد نانہہ روز گا ر وی مہیا کر سکیں گا۔ اُن نے صنعتی پیداوار اور لیبر محکمہ غی فلاحی اسکیمیاں غی موثر عمل آوری نانہہ یقینی بنان غی وی ہدایت کی۔

Dy CM Mining

جموں کشمیر غا نائب وزیر اعلیٰ سریندر کمار چودھری نے جموں کشمیر غے اندر غیر قانونی طور ور ہو رہی کان کنی ور مکمل پابندی عائد کرن ور زور پایو ہے اور کہیو کہ اس طرح غا معینیا تی ذرائع نانہہ معاشی ترقی اور عوامی اثاثہ غے طور شفافیت نال استعمال کرن غی ضرورت ہے۔ سول سیکریٹریٹ مانہہ منعقدہ اک جائزہ میٹنگ غے دوران موصوف نے افسراں نانہہ ہدایت جا ری کی کہ وے قدرتی وسائل غو ہر طریقہ نال تحفظ یقینی بناویں اور پائیدار ترقی اور ماحول نانہہ صاف رکھن مانہہ اپنو کردار ادا کریں۔

DM Samba

ضلع مجسٹریٹ سانبہ راجیش شرما نے بھارتیہ نا گریک سرکشا سنہیتہ قانون غی شیک 163 غے تحت ضلع سانبہ غے اندر بین القوامی سرحد غے نیڑے 2 کلو میٹر علاقہ غی حدود مانہہ ہر قسم غا پٹاخاں غی خرید و فروخت اور استعمال ور مکمل پابندی عائد کر دتی ہے۔ اس

حکمنامہ غی تعمیل آج تیں ہی وے گی اور اس حکم غی مدت آئندہ 2 مہیناں تک رکھی گئی ہے۔

Panchyati Raj

پنچایتی راج غا ڈائریکٹر شام لال نے گذشتہ روز اک میٹنگ طلب کر غے پنچایتی راج نظام غی مضبوطی واسطے چلایا گیا اقدامات غو جائزو لیو۔ اس میٹنگ غے دوران پنچایت گھراں غی صورتحال اور ضلع پنچایت ذرائع مرکزاں گا قیام ور تبادلہ خیال کیو گیو۔ ڈائریکٹر موصوف نے پنچایت گھراں غی تعمیر غی اہمیت ور زور پایو اور متعلقہ اے سی پیس نانہہ ہدایت جاری کی کہ وے اس طرح غا پروجیکٹاں نانہہ وقت رہتیں مکمل کریں تا نجے دیہی تے دور دراز علاقاں مانہہ سرکار غی خدمات پہنچان مانہہ مزید آسانی وے۔

DC Doda

ڈپٹی کمشنر ڈوڈہ ہر ویندر سنگھ نے گذشتہ روز بہدرواہ غے اندر چل ریبا تعمیراتی کم کاج غو تفصیلی جائزو لیو۔ اس دوران نوی تعمیر ہو رہی لا ٹبریری غو وی جائزو لیو گیو۔ جس غی تعمیر دسمبر 2024 مانہہ مکمل ہونی ہے۔ اس دورہ غے دوران موصوف نے پرانا کتب خانہ غے اندر دستیاب سہولیات غو وی جائزو لیو۔ میونسپل کمیٹی بہدرواہ غی طرفوں تعمیر کیا جان آلا ہو سٹل ور کم کاج غا معیار غو جائزو لین تیں بعد ڈی سی موصوف نے با ز آباد کاری مرکز بہدرواہ غو وی دورو کیو جس دوران اُت موجود تمام سہولتاں غو جائزو لیو گیو۔

DC Poonch

عوام غی مشکلات تے شکایات غا ازالہ خاطر ضلع انتظامیہ پونچھ نے گذشتہ روز سرنکوٹ گا بلاک لسانہ مانہہ عوام تک رسائی پروگرام منعقد کرایو۔ اس دوران تمام متعلقہ محکماں گا افسراں تیں علاوہ سیکٹر افسر اور دیگر اعلیٰ عہدیدار وی موجود تھ۔ ڈی سی پونچھ وکاس گنڈل نے مقامی لوکاں غی شکایات تے بکھ بکھ معاملات سُنیا۔ مقامی لوکاں نے روز مرہ غی زندگی مانہہ پیش آن آلی بکھ بکھ مشکلاں ور اپنی مانگ درج کرائی۔ جن مانہہ پانی سپلائی، سڑک رابطہ، طبی خدمات وغیرہ شامل تھیں۔ ڈی سی موصوف نے مقامی لوکاں غی شکایات سُنی اور اُن گا ازالہ غو یقین دوايو۔ اُن نے لسانہ غی عوام واسطے زندگی غا معیار نانہہ بہتر بنان غی یقین دہانی کرائی ہے۔

Handicraft

ضلع ریاسی گا ہتھ کھڈی تے دستکاری محکمہ نے گذشتہ روز ٹھاکرا کوٹ بلاک مانہہ اک بیداری پروگرام منعقد کرایو، جس دوران عوام نانہہ محکمہ غی بکھ بکھ فلاحی اسکیمیں بارے بیدار کیو گیو۔ اسسٹنٹ ڈائریکٹر اجول سنگھ سمبیل نے مقامی لوکاں نال ملاقات کی اور کہیو کہ محکمہ مقامی دستکاراں غی حوصلہ افزائی اور اُن غا ہنر بابدہ واسطے مالی تعاون وی کرے گو۔ موصوف نے مقامی ہنر منداں تے دستکاراں نانہہ کہیو کہ وے دستیاب موقعاں غو فائدو لیں اور علاقہ غا ثقافتی ورثہ غا تحفظ مانہہ اپنو اہم کردار ادا کریں۔

اس غے نال ہی خبراں غو یوہ بلیٹن ختم ہوؤ۔